

Rector Dr. Glenn Thodé ta orguyoso cu:

Universidad di Aruba a celebra momento historico cu Ryçond Santos do Nascimento

ORANJESTAD (AAN)--- Universidad di Aruba a celebra un momento historico cu otorgamento di su prome diploma di PhD (Doctor of Philosophy) na Ryçond Santos do Nascimento diahuebs

ultimo. E ultimo aki a presenta y defende su tesis titula "Het Koninkrijk ontsluiert" dilanti un comision di evaluacion, forma pa profesornan y docenten di Universidadnan na Hulanda y Corsou, cu

e Rector di Universidad di Aruba na cabes.

Dr. Glenn Thodé, kende ta Rector di Universidad di Aruba a splica cu Ryçond Santos do Nascimento a prueba cu tin otro maneranan

pa descubri y discuti conocimiento nobo pa medio di investigacion cientifico di e tema cu ya a conoce analisis hopi profundo, esta "statuut di Reino Hulandes". Glenn Thodé den nomber



di e comunidad academico di e universidad a gradici y felicita Dr. Ryçond Santos do Nascimento pa e trabao cu el a haci, demostrando "creatividad nobo". El a prueba cu den e ramo di ley na Universidad ta posibel pa cana e trayectoria completo di "Bachelor", sigui pa "Master" y awor hasta na nivel "PhD". Cu e logro historico aki ta demostra cu un estudiante di Aruba por cana henter e trayecto aki na cas mes. Glenn Thode a bisa, e por midi su mes cu científiconan di rond mundo, di otro universidadnan y e por drenta den debate y convence nan cu e tin bon argumento y asina yuda cu e evolucion di ciencia na Aruba pa medio di su trabao.

E promocion di Ryçond Santos do Nascimento tabata posibel como cu Universidad di Aruba mes tin un profesor nombra pa e universidad kende a guia e proceso di su investigacion cientifico. Na final Ryçond Santos do Nascimento por a convence e comision cu el a descubri conocimiento nobo, forman nan nobo pa mira e tema cu el a investiga, asina rector Glenn Thode a agrega.

Universidad di Aruba ta existi desde aña 1989 y entretanto ta conta cu no menos di 600 estudiante, parti den e Facultad di ley (mas bieu), Economia (FEF), Hospitalidad & Maneho di Turismo y Ciencia & Arte (mas nobo).